

- मुख्यमंत्री भजन लाल शर्मा जनता ऊँ शहरी अर ग्रामीण सेवा शिविरां रो फायदो लेवण री अपील कीनी।
- प्रधानमंत्री नरेन्द्र मोदी रा 25 सितम्बर ने बांसवाड़ा रा प्रस्तावित दौरा ने ध्यान रखता थकां मुख्यमंत्री भजन लाल शर्मा अहलकारां सागे मीटिंग कीनी।
- राजस्थान कर्मचारी चयन बोर्ड री ओर ऊँ काल तीन दिन ताईं रोजीना दो पारियां मांय चतुर्थ श्रेणी कर्मचारी भर्ती परीक्षा ली जावेला।
- पुलिस लोगां ने साइबर धोखाधड़ी ऊँ बचावण सारू ई-स्कैन बोट रिमूवल ऐप काम लेवण री राय दीनी।

000

प्रदेश मांय लगाया जा रहया शहरी अर ग्रामीण सेवा शिविरां मांय लोगां री समस्यावां सुलझाई जा रही है। मुख्यमंत्री भजन लाल शर्मा जयपुर मांय राख्यी ज्या शहरी सेवा शिविर रो दौरा कीनी। वां सागे भाजपा रा नेता अशोक परनामी अर जनता रा केई नुमाइन्दा मौजूद हा। ई मौके मुख्यमंत्री जनता ऊँ आं शिविरां रे जरिए न्यारा-नयारा सरकारी सुबीतां रो फायदो लेवण री अपील कीनी।

000

संसदीय कार्य मंत्री जोगाराम पटेल आज जोधपुर री बड़ली ग्राम पंचायत मांय लगायी ज्या ग्रामीण सेवा शिविर रो दौरा कीनी। वे बतायो के आं शिविरां मांय मूल निवास अर जाति प्रमाण-पत्र जारी करण, स्वामित्व पट्टा बणावण, किसान गिरदावरी एप रे जरिये गिरदावरी, सामाजिक सुरक्षा पेंशन अर पालनहार सरीखी योजनावां ऊँ जुड़या मामला निपटाय जा रहया है। श्री पटेल अहलकारां ने किसान रजिस्ट्री अर एनएफएसई ई-केवाईसी रा लक्ष्य पूरा करण रा हुकम दीना। शिविर मांय मंगला पशु बीमा पॉलिसी अर पोषण किट ई बांटी ज्या। पाली मांय शहरी सेवा शिविर रा तैत आज नगर निगम मांय पीएम अर मुख्यमंत्री स्वनिधि योजना रा सांकेतिक चैक बांटी ज्या।

000

प्रदेश मांय चलाया जा रहया 'सेवा पखवाड़ा' रा तैत आज जयपुर रा जग प्रसिद्ध जंतर-मंतर माथे पर्यटन विभाग री ओर ऊँ स्वच्छता अभियान राख्यी ज्यो। ई मौके उपमुख्यमंत्री दीया कुमारी ई मौजूद रही। वे कह्यो के प्रधानमंत्री नरेन्द्र मोदी कानी ऊँ चलायी ज्या 'स्वच्छ भारत मिशन' अर 'प्लास्टिक मुक्त भारत' री पहल अब जनता रो आंदोलन बण गयी है। दीया कुमारी कह्यो के ओ अभियान न केवल पर्यावरण ने बचावण मांय मददगार है बल्कि सैर-सपाटा ने ई बधावो दे रह्यो है। वे जनता ऊँ साफ-सफाई ने केवल अभियान मानण री बजाए रोजमर्रा रो हिस्सा बणावण री अपील कीनी।

000

प्रधानमंत्री नरेन्द्र मोदी रा 75 वां जन्मदिवस रा सिलसिला मांय राख्या जा रहया कार्यक्रम रा तैत राष्ट्रीय पुरस्कार ऊँ नवाजी ज्यी फिल्म, चलो जीते हैं, आखा देश मांय स्कूलां अर करीब 500 सिनेमाघरां मांय बतायी जा रही है।

आ फिल्म प्रधानमंत्री मोदी रा बाळपणा रा वाकया ऊँ जुड़ी है। चलो जीते हैं फिल्म एक नौजवान लड़का - नारू - री कहानी है, जो स्वामी विवेकानंद री सोच ऊँ प्रभावित रहे र वां री छोटी सी दुनिया मांय बदलाव लावण री कोशिश करी है। साल 2018 मांय रिलीज व्ही आ फिल्म वां साल री सब ऊँ बत्ती देखी जावण वाळी नान्ही फिल्मां मांय शामिल ही। ई लघु फिल्म ने साल 2019 मांय 66वां राष्ट्रीय फिल्म पुरस्कारां मांय पारिवारिक मूल्यां

माथे आधारित बेहतरीन गैर-फीचर फिल्म रा राष्ट्रीय पुरस्कार ऊँ नवाजी ज्यी ही। सूचना अर प्रसारण मंत्रालय इण ने स्वामी विवेकानंद री सोच अर विचारों रा प्रति सिनेमाई श्रद्धांजलि बतायी है। मंत्रालय रे मुजब ई फिल्म ऊँ नुवी पीढ़ी ताई स्वामी विवेकानन्द रो संदेश असरदार तरीका ऊँ पूगावण मांय मदद करेला। आ फिल्म 2 अक्टूबर ताई बतायी जावेला। प्रदेश मांय ई न्यारी-न्यारी स्कूलां अर सिनेमाघरां मांय आ फिल्म बतायी जा रही है। जोधपुर रा न्यारा-न्यारा सिनेमाघरां मांय आज ऊँ सात दिन ताई सगळा विधानसभा हलकां मांय भाजपा रा कार्यकर्तावां ने आ फिल्म बतायी जा रही है। भीलवाड़ा रा सिनेमाघरां मांय ई आ फिल्म बतायी जा रही है। अजमेर रा सिनेमा घरां मांय बतायी ज्यो पहलो शो देख्यां पाछे भाजपा रा शहर अध्यक्ष रमेश सोनी इण ने प्रेरणा देवण वाळी फिल्म बतायी।

000

फिल्म देख्यां पाछे उदयपुर रा मनीष शर्मा कह्यो के श्री मोदी री जिन्दगी ऊँ सगळां ने सीख मिले है।

000

लोकसभा अध्यक्ष ओम बिरला री अगुवाई मांय आज कोटा मांय नमो टॉय बैंक री सुरुआत करी ज्यी। प्रधानमंत्री नरेन्द्र मोदी रा जन्मदिन रा सिलसिला मांय चाल रह्या कार्यक्रमां रा तैत करी ज्यी ई पहल री सुरुआत बच्चां रा हाथां ऊँ करायी ज्यी। कोटा री स्कूलां रा विद्यार्थी टॉय बैंक सारु जरूरतमंद बच्चां बाबत मोटी तादाद मांय खिलौना दान कीना है। ई मौके श्री बिरला कह्यो के बच्चा खिलौना बैंक रे मार्फत केवल खिलौना नहीं बल्कि मुस्कान साझा करेला। वे कह्यो के बच्चां मांय देवण री खुशी अर समाज रा प्रति जिम्मेदारी री भावना जागेला।

श्री बिरला कह्यो के प्रधानमंत्री मोदी री सोच है के देश रो भविष्य बच्चां री मुस्कान मांय बसे है।

000

प्रधानमंत्री नरेन्द्र मोदी रो 25 सितम्बर ने बांसवाड़ा आवण रो कार्यक्रम है। श्री मोदी वठे करीब 45 हजार करोड़ रुपया रा खर्च वाळी परमाणु ऊर्जा परियोजना रा काम री नींव रखेला। मुख्यमंत्री भजन लाल शर्मा प्रधानमंत्री रा दौरा री तैयारियां रो आज वां रा दफ्तर मांय अहलकारां सागे मीटिंग कर र जायजो लीनो अर जरूरी हुकम दीना। भाजपा रा प्रदेश अध्यक्ष मदन राठौड़ ई प्रधानमंत्री रा दौरा री तैयारियां रो जायजो लेवण सारु डूंगरपुर-बांसवाड़ा रो दौरा कर रह्या है। वे खबरनवीसां सागे बातचीत करता थकां बतायो के प्रधानमंत्री रा कार्यक्रम रे दौरान केन्द्र अर राज्य सरकार रा केई मंत्री, जनता रा नुमाइन्दा अर दूजा खास लोग ई मौजूद रहवेला। श्री राठौड़ कह्यो के 2800 मेगावॉट बिजली बणावण रा बूता वाळी आ परियोजना प्रदेश अर देश सारु ऐतिहासिक उपलब्धि वाळी साबित व्हेला।

000

राजस्थान कर्मचारी चयन बोर्ड री ओर ऊँ काल ऊँ 21 सितंबर ताई चतुर्थ श्रेणी कर्मचारी भर्ती परीक्षा ली जावेला। 53 हजार 749 ओहदां माथे भर्ती सारु व्हे रही ई भर्ती परीक्षा मांय बैठण सारु करीब पौने पच्चीस लाख उम्मीदवार अर्जियां दीनी है। बोर्ड रा सचिव बी. सी. बघाल बतायो के उम्मीदवारां री मोटी तादाद ने ध्यान राखता थकां आ परीक्षा तीन दिन ताई रोजीना दो पारियां मांय संवारे दस ऊँ दोपहर बारह बज्या ताई अर दोपहरां पाछे तीन ऊँ सिंज्यां पांच बज्यां ताई ली जावेला।

प्रदेश रा 38 जिलां मांय ई सारु 1200 परीक्षा केन्द्र बणायी ज्यो है। परीक्षा सारु रेलवे रा जोधपुर मण्डल री ओर ऊँ बाड़मेर-जोधपुर अर जोधपुर कने भगत की कोठी ऊँ जयपुर कने खातीपुरा बीच खास रेलगाड़ियां चलायी जा रही है। उत्तर पश्चिम रेलवे 14 जोड़ी खास रेलगाड़ियां चलावण रो ऐलाण कीनो है।

000

जीएसटी परिषद् री ओर ऊँ लारला दिनां करी ज्या कर सुधारां ऊँ न्यारा—न्यारा हलकां ऊँ जुड्यां लोगां ने आराम मिलेला। जीएसटी री कम करी ज्यी रेट ई महीना री 22 तारीख ऊँ लागू व्हेला। साइकिल उद्योग ऊँ जुड्या लोगां ने ई इण रो फायदो मिलेला। आ जीएसटी सुधारां रे जरिये सरकार जनता सारू पर्यावरण—अनुकूल परिवहन ने आसान अर किफ़ायती बणावण रा मकसद ऊँ साइकिल उद्योग ने साता दीनी है। साइकिलां अर वां रा पुर्जा माथे जीएसटी री रेट 12 फीसदी ऊँ घटा र 5 फीसदी कर दीरीजी है। साइकिल कारोबारी पुनीत मेहता सरकार रा ई कदम रो स्वागत कीनो।

000

राज्य पुलिस री साइबर क्राइम शाखा जनता ने मालवेयर अर साइबर धोखाधड़ी ऊँ बचावण सारू खास एडवाइजरी जारी कीनी है। साइबर क्राइम शाखा रा एस.पी. शांतनु कुमार सिंह बतायो के साइबर अपराधी नकली वेबसाइट, मालवेयर अर फिशिंग लिंक भेज र लोगां री व्यक्तिगत अर माली जाणकारी चुरा रह्या है। पुलिस ऐंडा हमला ऊँ बचाव सारू ई—स्कैन बोट रिमूवल ऐप काम लेवण री राय दीनी। ई ऐप रे ज़रिए मोबाइल या कंप्यूटर ने नियमित तौर ऊँ स्कैन कर र नुकसान करण वाली फाइलां हटायी जा सके है। साइबर धोखाधड़ी व्हेवण री सूरत मांय तुरत नजदीकी पुलिस थाणा, साइबर पुलिस थाणा या साइबर क्राइम रिपोर्टिंग पोर्टल cybercrime.gov.in माथे शिकायत करी जा सके है। ई रे अलावा साइबर हेल्पलाइन नंबर 1930 अर हेल्पडेस्क नंबर 9256001930 अर 9257510100 माथे ई संपर्क कर्यो जा सके है।

000